

ساعات ب سمع صوتها

ساعات ب سمع صوتها

يرن ف وداني

كأنه نغم معزوف ب يطرب وجداني

وساعات أنادي عليها

وهي جنبي ومش سمعاني

وساعات كلامها زي الدبش رصاص مغلي

وساعات كله حِكم ومعاني

وساعات عاملة دوشة

بس روشة ومليا كياني

وساعات تغازل عيوني ب ضحكة حلوة

وساعات ب زغرة تبخ وترخ وتقلب الأمانى

وساعات ب تكون قصادي

ومش شايفها هي هنا ولا هي شيفاني

وساعات ب حس بغربة وساقعه واني وكداني
وساعات أشوفها جميلة
ملكة متوجه فعلاً أميرة
وساعات احس ب جفاف واني مش مرتاح
وساعات حنينه محتاجة طبخة وود وسماح
وساعات ب أشوفها حنفي أو عطية
أسطي م فيش زيها في النكد والتكشيرة
وساعات ملاغية طيوبة هلاهلية
وتخش دغري جوا القلب من غير تأشيرة
مع إنها مغازلة روعي وأشجاني
والعيب ممكن يكون دا فيا
وهي بلسم جروحي حقيقي ووحشاني